

## Vumisani ! kwi Nyange Lemihla ! !

### Yimbongikazi Nontsizi Mgqwetto.

Hai ! Ukuhlala kwawo wodwa Umzi  
Obantu babenikwe Intsikolelo  
Amasango etu onke akanamntu  
Nababandezeli basuke bayintloko. Camagu !

Halahoyi ! Afrika nalo ke ivumba  
Linukisa okwe nyoka yomlambo  
Intsikolelo zagxotwa yintonina  
Namasiko sekusa siwafanisa.

Panda pantsi uxele amahlungulu  
Intsikolelo zasishiy' elubala  
Ndingatini betu kungeko nanye nje  
Kwinto zakowetu engabisasele.

Amasiko etu anxitywa ilokwe  
Yinkohliso yodwa nobumenemene  
Kwakutatwa izitembu tina siyashwesha  
Ukuze singaqondwa ngawo amaqaba.

Ax'entsa intlombe zix'entswa nasiti  
Siggobok' emini kuhlwe sizinc'uka  
Sizakwiwe konke kuba sinxazonke  
Nabalandelayo bobeta besotuka.

Akukonto kuyiyo ngapantsi kwelanga  
Konke ngamampunge awo amampunge  
Tu ! Nto ! Nabuzwe ! Sesinjengenciniba  
Ipote ubukosi konke elutulini.

Sasifudula sisitya sihluta  
Sasifudula sinemfuyo eninzi  
Umhlabo lo ngezomini zobawo  
Ingwe yetunzi—Umfusa wapakade

Ngalo maxesha imvula zazisina  
Ngalo maxesha amasimi ec'uma  
Naso ! Isiprofeto sika Ntsikana  
Tina siwugqwetile Umhlaba ka Palo.

Lomzi wobawo wawumxhelo mnye  
Kodwa kunjalo usesebunyameni  
Kodwa ke tina mpi yamagqoboka  
Sigube n Satana usisinkwabalala  
Ze nezitixo zibe sagqoboka  
Zisenz'amalunga ahamb' Iremente  
Siti xa sivuma—Nkosi sihlangene  
Siti saknpuma maye sich'itane.

Bhekan' ezincwadini ze Nyange Lemihla  
Isibhalane esabhala masiko  
Njengebhadi libhadula ukufuna umtombo  
Ngawubhadule nawe ufune amasiko.

Intsikolelo zagxotwa yintonina  
Nezik'ulu zetu zonke zati qutu  
Tu ! Nenkosi sekulaula inkunkuma  
Tu ! Miteto bate cwaka abo gaga.

Vumisani nonke kwi Nyange Lemihla  
Nlibulele nilandlalel' uk'uko  
Akuko nto kuyiyo ngapantsi kwelanga  
Semka namampunge awo amampunge.

Hom ! Yenzani isijwili nesikalo  
Nikumbule ukuba niyinzalo apa  
Eyashiywa ke ngobawo entilini  
Yaza yaba sisisulu sezizwe.

Akuko nto kuyiyo ngapantsi kwelanga  
Semka namampunge awo amampunge  
Imkile nemlene ebindizimasa  
Ukuba ndinomntu ngeyeyiputuma.

Intsikolelo zagxotwa yintonina  
Nentombi azisagidi ngalubambo  
Sezik'aba nje kupela onomtatsi  
Zemka ! Intomo notixo basenzini

Sasifudula ngezomini zobawo  
Sisitya nezigamo zasendle  
Kodwa namhla osezantsi ngesezantsi  
Oya kudla iqumbe ngapezulu.

Ndoda ecingayo yivake  
Ubeke amehlo ngasemva  
Biza inkumbulo ivuke  
Ixele intlalo endala.

Yayama emamelelweni  
Upulapulise indlebe  
Yolul' amapiko usinge  
Ngasemaxesheni akude.

Uzeke kwakona indaba  
Zemihla yo Palo no Tshiwo. Camagu !